



## 炕窯

今年歇寒的時陣，阿爸個公司的同事，相招拜六欲去大肚山的望高寮坦迤。約定九點集合，阮七早八早就起床。阿母去菜市仔攢阮兜分配愛紮的物件。一家伙仔五个人，八點半就到約定的所在。

逐家攏真準時，猶未九點就攏齊到矣。遮是阿爸同事的田地，規片平坦坦攏是番薯園。這個所在離成功嶺差不多一公里，佇大肚山的嶺頂台地。向東，會當看著繁華的臺中市；向西會當看著臺灣海峽；向南會當看著八卦山大佛。看會著的所在攏真闊，莫怪會號做「望高寮」。大肚山的塗是紅仁塗，上蓋出名的土產就是番薯佮塗豆。

聽阿爸的同事講，個遮的田，攏是用輪作的。一季種番薯，一季種塗豆，另外一季種番麥。這季輪著種番薯，今仔日阮來遮，主要就是欲炕窯。遮的番薯，全部攏是五十七號仔，白皮黃肉，瘦抽瘦抽，袂講蓋大條。

逐家到位了後，大約有十口灶，五十个人彼跤兜。大人比囡仔加兩三个。田主分配工課予大人做：有人起塗窯、有人拈柴、有人掘番薯。囡仔自由跔邊仔做助手，若無，嘛會當去空地仔耍。遮有幾座報廢的碉堡，佮幾擔路邊擔仔咧烘煙腸、拍珠仔台、賣風吹……。

三窯塗窯起好勢了後，開始燃火，共窯內的火保持予上炎。無佹久，所有的塗就攏燒甲紅絳絳。繼落去，共拄掘起來的番薯，園落去塗窯內底，才用「塗錫」共塗窯損予碎，共番薯嵌甲密密密。閣挖邊仔的冷塗嵌跔面頂，予燒氣較袂傷緊散。攏處理好勢了後，逐家就去空地仔耍。過成點鐘，大人開始攢中晝頓，猶未十二點就食甲半飽。繼落去就是今仔日的好戲——食炕好的番薯。

看大人掛手梟仔，咧挖猶閣燒 hut-hut 的塗窯。芳 kòng-kòng 的番薯味，衝入逐家的鼻空內，予阮看甲喙瀾強欲津落來。袂堪得等到冷，阮就一人提一條，開始鑑定今仔日的成績，真正芳閣飪。食兩條了後，腹肚嘛感覺真飽矣。有這擺難忘的經驗，我共阿爸姑情講：「以後逐年上少愛恁規家伙仔去炕窯一擺。」

作者：林義和

### ☆詞彙學習☆

【瘦抽】sán-thiu：又唸作 sán-thio。形容一個人的身材細瘦、高挑。

【跤兜】kha-tau：附近、左右。

【工課】khang-khuè：工作、事情。

【拈】khioh：拾取、撿取。

【炎】iām：形容火勢或陽光猛烈。

【紅絳絳】âng-kòng-kòng：紅彤彤。形容顏色極紅。

【嵌】khàm：覆蓋。

【姑情】koo-tsiânn：懇求、情商、央求。